



REPUBLIKA E SHQIPËRISË
KOMISIONI QENDROR I ZGJEDHJEVE

KOMISIONI RREGULLATOR

Data: 11 Mars 2021

Nr.: 10

VENDIM

**PËR PROCEDURËN E HEDHJES SË SHORTIT PËR PËRCAKTIMIN E RENDITJES SË
SUBJEKTEVE ZGJEDHORE NË FLETËN E VOTIMIT
PËR ZGJEDHJET NË KUVEND**

Në mbështetje të neneve 20, pika 1, shkronja "a", e 98, pika 5, të ligjit, nr. 10019, datë 29.12.2008, "Kodi Zgjedhor i Republikës së Shqipërisë", të ndryshuar, Komisioni Rregullator

V E N D O S:

Neni 1

Objekti dhe qëllimi

Ky vendim synon të përcaktojë rregullat për hedhjen e shortit për përcaktimin e renditjes së subjekteve zgjedhore në fletën e votimit duke u bazuar në parimin e transparencës dhe barazisë.

Neni 2

Renditja e subjekteve zgjedhore në fletën e votimit në zgjedhjet për Kuvend

1. Renditja subjekteve zgjedhorë (partive politike dhe koalicioneve zgjedhore, të cilët kanë regjistruar listat shumemërore) në fletën e votimit për zgjedhjet për Kuvend, bëhet me short.
2. Në rast se për një zonë zgjedhore regjistrohen kandidatë të propozuar nga zgjedhësit, renditja midis këtyre përcaktohet me short. Në renditjen përfundimtare të fletës së votimit, kandidatët e propozuar nga zgjedhësit vendosen pas renditjes së subjekteve zgjedhore të përcaktuar në pikën 1 të këtij neni. Në rast se për një zonë zgjedhore ka vetëm një kandidat të propozuar nga zgjedhësit, nuk hidhet short.



Data: 11 Mars 2021
Nr. 10

Për procedurën e hedhjes së shortit për përcaktimin e renditjes së subjekteve zgjedhore në fletën e votimit për zgjedhjet në Kuvend

3. Në rast se në përfundim të hedhjes së shortit, renditen njëri pas tjetrit subjekte zgjedhorë të cilët kanë emrin zyrtar, emblemën (siglën) apo shkronjat nistore të përafërta dhe që mund të shkaktojnë konfuzion apo lajthitje te votuesit, shorti përsëritet deri në renditjen që nuk shkakton konfuzion tek votuesit.

Neni 3

Veprimet paraprake

1. Sekretari i Përgjithshëm i Komisionit Qendror të Zgjedhësve (KQZ-së) njofton përfaqësuesit e subjekteve zgjedhore të cilët janë regjistruar listat shumemërore dhe kandidatët e propozuar nga zgjedhësit për datën dhe orën e caktuar për organizimin e shortit.
2. Data, vendi dhe ora e zhvillimit të shortit publikohen në faqen zyrtare të internetit të KQZ-së dhe shpallet në hyrjen e saj në këndin e njoftimeve.
3. Mosparaqitja e ndonjë prej përfaqësuesve të subjekteve zgjedhore, nuk pezullon procedurat e shortit. Në këtë rast, Komisioneri Shtetëror i Zgjedhjeve, cakton një nëpunës të administratës së KQZ-së të tërheqë goglën për subjektin zgjedhor, përfaqësuesi i të cilit nuk është i pranishëm.

Neni 4

Procedura e shortit për përcaktimin e renditjes së subjekteve zgjedhore

1. Në një enë transparente futen aq gogla sa është edhe numri i subjekteve zgjedhore pjesëmarrëse në short. Goglat duhet të jenë të së njëjtës ngjyrë, jo transparente, pa shenja apo shënime, dhe të së njëjtës peshë e madhësi.
2. Në secilën prej goglave futet nga një shirit letre ku shënohet një nga numrat duke filluar nga numri 1 (një) deri tek numri i barabartë me numrin e subjekteve zgjedhorë, pjesëmarrës në short. Shiritat e letrës janë të barabartë dhe verifikohen për saktësinë nga të gjithë të pranishmit nëpërmjet ekspozimit nga Sekretari i Përgjithshëm/personi i autorizuar. Pas verifikimit, Sekretari i Përgjithshëm/personi i autorizuar i palos shiritat në mënyrë të njëjtë dhe i vendos në goglat përkatëse. Goglat vendosen në enën transparente dhe përzihen, me qëllim sigurimin e barazisë në përzgjedhje.
3. Përfaqësuesit e subjekteve zgjedhore tërheqin nga ena me radhë një gogël. Përfaqësuesi i subjektit zgjedhor do të hapë goglën dhe do të lexojë numrin që është shënuar në të. Ky numër do të jetë numrin

rendor që subjektit zgjedhor do të ketë në fletën e votimit. Administrata e KQZ mban procesverbalin e rezultatit të shortit.

4. Radha e tërheqjes së goglave nga përfaqësuesit e subjekteve zgjedhore përcaktohet me parashort, i cili zhvillohet sipas kësaj procedure:
 - a) Në një enë tjetër transparente futen aq gogla sa është edhe numri i subjekteve zgjedhore pjesëmarrëse në short.
 - b) Në secilën prej goglave, të cilat përmbushin karakteristikat e përcaktuara në pikën 1 të këtij neni, futet një shirit letre ku shënohet emri i subjektit zgjedhor.
 - c) KQZ cakton një person nga administrata për të tërhequr goglat.
 - ç) Personi i caktuar nga administrata e KQZ-së tërheq një gogël, e hap dhe lexon emrin e subjektit zgjedhor që është shënuar në shiritin brenda goglës dhe ia dorëzon sekretarit të përgjithshëm të KQZ-së.
 - d) Subjekti zgjedhor që është shënuar në shiritin e letrës brenda goglës së parë do të jetë i pari që do të tërheqë në shortin që do të zhvillohet sipas procedurës së përcaktuar në pikat 1, 2 e 3 të këtij neni e kështu do të vazhdohet deri në tërheqjen e të gjitha goglave brenda në enë.

Neni 5

Rezultati i shortit dhe ankimimi

1. Komisioneri Shtetëror i Zgjedhjeve miraton me vendim renditjen e subjekteve zgjedhore të dalë nga shorti.
2. Vendimi i Komisionerit Shtetëror të Zgjedhjeve mund të ankimohet në Komisionin e Ankimeve dhe Sanksioneve brenda 3 ditëve nga shpallja e tij.

Neni 6

Shfuqizim

Udhëzimi nr. 3, datë 4.3.2015, i Komisionit Qendror të Zgjedhjeve “Për procedurën e hedhjes së shortit për renditjen e subjekteve zgjedhore në fletën e votimit”, për rregullat dhe procedurat e hedhjes së shortit për zgjedhjet në Kuvend, shfuqizohet.



Neni 7
Hyrja në fuqi

1. Ky vendim hyn në fuqi menjëherë dhe publikohet në faqen zyrtare të Komisionit Qendror të Zgjedhjeve.
2. Kundër këtij vendimi mund të bëhet ankim në Kolegjin Zgjedhor të Gjykatës Administrative të Apelit Tiranë, brenda 5 (pesë) ditëve nga shpallja e këtij vendimi.

Iirjana NANO

Kryetar

Arens ÇELA

Anëtar

Dritan ÇAKA

Anëtar

Helga VUKAJ

Anëtar

Muharrem ÇAKAJ

Anëtar